


سیوان مشارکہ

Dewan

# Masyarakat

Berita • Maklumat • Ilmu



## Laporan Khas

Sinar Baharu  
Pesakit Kanser

Membendung  
Munafik Akademik


Hubungan Sulit:  
Ibarat Bom Jangka

Salleh Majid:  
Satu dalam 1000

Nasib Parti Politik  
Islam Indonesia

Tersungkur kerana  
Kuasa

Tragedi Februari 2012



Transformasi  
Perkhidmatan Awam



FEBRUARI 2012  
Semenanjung Malaysia :RM5.50  
Sabah/Sarawak :RM6.00  
Brunei Darussalam :BS\$5.50  
Singapura :SS\$5.50

KK 001-90250-0112  
ISSN 0419-0386



http://dwnmasyarakat.dbp.my

**M**alah bertajuk, "Universiti Kita Ketandusan Idea", tulisan Profesor Dr. A. Murad Merican dalam akhbar *Utusan Malaysia* pada 4 Oktober 2010, dan makalah bertajuk, "Pendidikan: Mencari Kebenaran", tulisan Profesor Dr. Dzulkifli Abdul Razak juga dalam akhbar *Utusan Malaysia* pada 12 Oktober 2010, membuka gelanggang perbincangan tentang kekalutan yang berlaku dalam sistem pendidikan peringkat universiti di negara ini.

Warga akademik di kebanyakan universiti tempatan sekarang sedang gelisah ekoran beberapa keputusan yang dibuat pada peringkat tertinggi universiti yang berlumba-lumba mahu meletakkan universiti masing-masing di kedudukan tertinggi universiti terbaik dunia.

Bukanlah tidak wajar meletakkan sasaran sedemikian, tetapi ketaasuhan mengejar sasaran tersebut membawa implikasi besar terhadap sebahagian daripada warga akademik yang terhambat pemikirannya dalam mengejar arus keduniaan dengan

# Membendung Munafik Akademik

Warga akademik di kebanyakan universiti tempatan sekarang sedang gelisah ekoran beberapa keputusan yang dibuat pada peringkat tertinggi universiti yang berlumba-lumba mahu meletakkan universiti masing-masing di kedudukan tertinggi universiti terbaik dunia.


Oleh Shaharuddin Idrus

mengetepikan soal maruah, moral dan etika. Mutakhir ini mengejar pangkat dan harta menjadi mainan utama sebahagian golongan cendekiawan tempatan. Lantas menjadikan suasana "keresahan" tersebut sebagai medan untuk kepentingan peribadi.

Akibatnya, segelintir warga akademik tempatan tidak lagi berminat untuk mempersoalkan teori atau idea besar yang diungkapkan oleh

sarjana Barat. Malahan golongan ini menerima bulat-bulat apa-apa juga yang disuapkan oleh pemikir dari Barat tanpa mengambil kira kesesuaianya dengan sosiobudaya tempatan.

Lantaran keresahan tersebut, wujud pula satu lagi golongan yang terangkum dalamnya ciri munafik yang tidak membawa kemajuan dan perkembangan ilmu untuk negara. Golongan ini sanggup menggunakan



Universiti menjadi medan untuk melahirkan golongan yang berfikiran kritis dan objektif.

apa-apa juga sumber yang ada tanpa mengira keutuhan moral dan etika. Yang penting, matlamat akhirnya berjaya mengejar pangkat berbanding dengan ilmu yang diilhamkan oleh Allah.

Salah satu ukuran yang digunakan oleh universiti tempatan dalam menentukan kedudukannya di persada global adalah penulisan ahli akademiknya yang diterbitkan dan terhimpun dalam pangkalan data yang diindeks melalui pelbagai bentuk dan jenis penerbitan – buku, bab dalam buku, jurnal, prosiding dan sebagainya.


Golongan munafik akademik ini tanpa segan silu mengeksplorasi sumber penerbitan yang diindeks dengan apa-apa juga cara dan mengetepikan soal moral serta etika. Malah dengan penuh bangga menafikan hak orang lain demi mencapai kedudukan dan pangkat.

Sebenarnya, fungsi asas kewujudan sesebuah universiti adalah untuk mencari kebenaran yang mungkin tidak dapat ditemui di tempat lain. Kebenaran yang dicari dapat diperoleh melalui penyelidikan yang dilakukan dengan penuh jujur dan keinsafan yang luhur yang terbit dari hati penyelidiknya.

Salah satu tugas utama universiti adalah untuk menjana pelbagai ilmu baharu yang dapat dimanfaatkan oleh masyarakat. Tenaga ahli akademik universiti tempatan perlu digembung untuk menjalankan penyelidikan yang berterusan bagi menghasilkan teori dan ilmu baharu yang mungkin mengubah pandangan dunia.

Hasil penyelidikan yang diperoleh diteliti, dicerakim, digarap, dan diterbitkan dalam pelbagai bentuk penerbitan sama ada dalam mahupun di luar negara. Jika jutaan ringgit yang dilabur oleh kerajaan untuk menghasilkan sesuatu penemuan penyelidikan datangnya dari negara ini, mengapakah harus hasil penyelidikan tersebut diterbitkan di negara luar dan bahasa yang lain pula?

Lebih wajar sekiranya hasil penyelidikan tersebut yang mungkin mengandungi nilai masyarakat di negara ini diterbitkan di Malaysia dan ditulis dalam bahasa Melayu.



Ahli akademik berfungsi menyalurkan ilmu untuk dikongsi bersama-sama dengan masyarakat.

Hal ini, pada masa yang sama dapat memartabatkan bahasa Melayu ke persada antarabangsa.

Misalnya di Jepun, penyelidikan yang dijalankan di negara tersebut diterbitkan dalam bahasa Jepun. Penyelidik dari Barat terpaksa merujuk dan mempelajari bahasa Jepun untuk mendapatkan ilmu tersebut. Secara tidak langsung bahasa Jepun berkembang di persada antarabangsa. Namun, hal sedemikian tidak berlaku di negara ini.

Selama ini, ahli akademik dianggap berfungsi menyalurkan ilmu yang dimiliki untuk dikongsi bersama-sama dengan masyarakat demimenselesaikan atau sekurang-kurangnya memberikan pedoman untuk menyelesaikan sesuatu isu yang berkaitan.

Namun, sejak kebelakangan ini, ilmu yang disalurkan seolah-olah melalui satu proses komoditi dan pembentukan modal bersandarkan ilmu yang dijana. Komoditi ilmu ini disalurkan melalui pelbagai bentuk tulisan yang disebarluaskan tetapi diletakkan nilainya dalam bentuk wang.

Lantaran itu, nilai ilmu yang ada menjadi bahan komoditi dagangan dan menguntungkan sesetengah pihak yang sentiasa mencari kesempatan untuk menangguh di air yang keruh. Ilmu yang sepatutnya dapat dimanfaatkan dengan sebaik-baiknya menjadi luntur akibat daripada proses komoditi.

Implikasinya pula secara tidak langsung jurnal tempatan terkubur akibat sokongan berlebihan diberikan kepada jurnal asing. Kiblat penerbitan beralih arah kepada jurnal yang diindeks dan mempunyai impak tinggi, sementara jurnal tempatan yang tidak diindeks dan tidak berimpak tinggi akhirnya terkubur.

Selain itu, situasi tersebut juga membunuh sumbangan penyelidikan yang ditulis dalam bahasa Melayu kerana tidak mendapat tempat di jurnal antarabangsa yang berindeks. Natijahnya, ilmu yang ditulis dalam bahasa Melayu terperap dan tidak dapat memberikan sumbangan yang sepatutnya.

Yang paling menyediakan usaha mendaulat dan menempatkan bahasa Melayu di persada ilmu tertinggi terbantut ekoran sanjungan berlebih-lebihan penerbitan asing. Akhirnya, rujukan yang ingin dibuat mengenai budaya, amalan, dan ilmu setempat pun perlu merujuk buku yang ditulis oleh penulis asing. Dek kerana asyik terpesona dengan indeks dan impak, ilmu setempat yang sewajarnya dibangunkan terbantut dan berkubur. Persoalannya, siapakah akhirnya yang rugi? **DM**

---

Penulis Felo Penyelidik / Pensyarah Kanan, Institut Alam Sekitar dan Pembangunan, Universiti Kebangsaan Malaysia.